

O Pleno do Parlamento de Galicia, na sesión do día 9 de outubro de 2023 aprobou, no punto único da orde do día (Debate anual de política xeral: doc. núm. 59922, 11/DEBA-000002), as seguintes resolucións:

1.^a Resolución

“O Parlamento de Galicia insta a Xunta de Galicia a se dirixir ao Goberno de España para que rectifique a decisión de excluír os produtos do mar, a carne e as súas conservas da rebaixa do IVE, de xeito que se lles aplique o IVE 0 % como medida de apoio para as familias con rendas baixas ou en situación de vulnerabilidade, para fomentar o consumo saudable e como iniciativa de apoio tamén aos sectores afectados. ”

Aprobada pola unanimidade das 73 deputadas e deputados

(Resolución resultante da transacción entre o G.P. do Bloque Nacionalista Galego e o G.P. Popular de Galicia verbo da proposta de resolución núm. 34 do G.P. Popular de Galicia)

2.^a Resolución

“O Parlamento de Galicia insta a Xunta de Galicia a solicitar ao Goberno central celeridade na xestión dos fondos do MRR que ten reservados a Administración xeral do Estado, en particular para o financiamento dos proxectos industriais transformadores pendentes de desenvolvemento na nosa comunidade, así como avanzar na transferencia e capacidade de xestión directa dos fondos asignados a Galicia. ”

Aprobada pola unanimidade das 73 deputadas e deputados

(Resolución resultante da transacción entre o G.P. do Bloque Nacionalista Galego e o G.P. Popular de Galicia verbo da proposta de resolución núm. 6 do G.P. Popular de Galicia)

3.^a Resolución

“O Parlamento de Galicia insta a Xunta de Galicia a exixir do Goberno de España unha data certa e concreta para a chegada dos trens AVRIL que permitan levar a alta velocidade ás cidades galegas, acompañando esta petición coa demanda das frecuencias necesarias para garantir uns servizos en AVE de calidade entre Galicia e a Meseta; ao tempo que debe reclamar do Executivo central compromiso e axilidade para completar a modernización do ferrocarril na comunidade, co impulso do AVE a Portugal, comezando pola saída sur, a conexión de Lugo e Ferrol coa alta velocidade, ou a modernización da rede interior.

Tamén no eido da mobilidade ferroviaria, en relación cos problemas da mobilidade ferroviaria no eixo atlántico e a liña A Coruña-Ourense, que demande: a adopción das medidas necesarias para evitar a sucesión de incidencias, avarías, atrasos, falta de prazas e de servizos e masificación do tren en Galicia (eixo atlántico, media distancia e AVANT); o axuste dos

horarios ás necesidades das persoas usuarias, e que aumente as frecuencias ferroviarias das conexións mencionadas nas franxas da mañá e de mediodía, e estender os servizos de última hora nas conexións do eixo atlántico, AVANT e media distancia; e a recuperación dos servizos ferroviarios suspendidos como consecuencia da pandemia da covid 19.

E en relación coas infraestruturas viarias, reclamar o avance na construción das autovías estatais pendentes, como a autovía Santiago-Lugo, as autovías interiores A-56 e A-76, a autovía da Mariña, a autovía Vigo-O Porriño, ademais de máxima axilidade na reconstrución dos viadutos da A-6 no acceso a Galicia.

Así mesmo, a Xunta de Galicia avanzará nas súas infraestruturas autonómicas pendentes, entre outras, a VAC Costa Norte ou autovía da Costa da Morte. ”

Aprobada pola unanimidade das 73 deputadas e deputados

(Resolución resultante da transacción entre o G.P. Popular de Galicia, o G.P. do Bloque Nacionalista Galego e o G.P. dos Socialistas de Galicia, verbo da proposta de resolución núm. 34 do G.P. do Bloque Nacionalista Galego coa núm. 15 do G.P. Popular de Galicia)

4.^a Resolución

“O Parlamento de Galicia insta a Xunta de Galicia a demandar do Goberno de España a urxente convocatoria do Consello de Política Fiscal e Financeira, onde se aborde a reforma do modelo de financiamento autonómico, no que Galicia traballará a prol de avanzar no autogoberno económico e financeiro para blindar o autogoberno e garantir uns servizos públicos de calidade e as necesidades de transformación económica, defendendo un financiamento xusto para Galicia, mellorando a proposta actual de poboación axustada e para defender a ponderación adecuada dos sobrecustos que a dispersión e o envellecemento implican na prestación dos servizos públicos galegos, así como doutros factores que condicionan o desenvolvemento socioeconómico galego. Así mesmo, defenderase a valoración dun modelo xusto de financiamento local que supere a discriminación histórica dos concellos galegos e, no caso de condonación ás comunidades que se adherisen ao FLA, que se compense equitativamente as comunidades que non o fixeron. ”

Aprobada pola unanimidade das 73 deputadas e deputados

(Resolución resultante da transacción entre o G.P. do Bloque Nacionalista Galego e o G.P. Popular de Galicia verbo das propostas de resolución núm. 3 do G.P. do Bloque Nacionalista Galego coa núm. 2 do G.P. Popular de Galicia)

5.^a Resolución

“O Parlamento de Galicia insta a Xunta de Galicia a adecuar os condicionantes do Fondo Europeo Marítimo de Pesca e de Acuicultura (FEMPA) ás circunstancias do sector marítimo-

pesqueiro, crear equipos e servizos de asesoramento profesionalizados e especializados e intensificar o labor de divulgación e distribución destes fondos, de cara a aproveitar ao máximo estes fondos estruturais e mellorar a execución do FEMP.”

Aprobada pola unanimidade das 73 deputadas e deputados

(Resolución resultante da transacción entre o G.P. dos Socialistas de Galicia e o G.P. Popular de Galicia verbo da proposta de resolución núm. 35 do G.P. Popular de Galicia)

6.^a Resolución

“O Parlamento de Galicia insta a Xunta de Galicia a colaborar co Goberno de España, de forma prioritaria durante o período de presidencia española no Consello de Europa, na divulgación dos valores do Camiño de Santiago a través de iniciativas no Parlamento Europeo, aproveitando a inmejorable plataforma comunicativa que constitúe o Camiño; demandar tamén do Goberno do Estado a divulgación dos seus valores tradicionais, así como outros tan importantes como a tolerancia, o respecto á diversidade sexual, a igualdade entre homes e mulleres ou a corresponsabilidade.”

Aprobada por 60 votos a favor, 0 en contra e 13 abstencións.

(Resolución resultante da transacción entre o G.P. do Bloque Nacionalista Galego e o G.P. Popular de Galicia verbo da proposta de resolución núm. 8 do G.P. Popular de Galicia)

7.^a Resolución

“O Parlamento de Galicia insta a Xunta de Galicia a demandar do Goberno do Estado que siga incrementando o cofinanciamento ata o 50 % da Lei de dependencia para que a participación da Xunta de Galicia e do Goberno central sexa equitativa, tendo especialmente en conta o desequilibrio acumulado desde a aprobación desta normativa en 2006, ao mesmo tempo que a Xunta de Galicia adaptará as libranzas e servizos da Lei de dependencia ao Real decreto 675/2023, do 18 de xullo, do Goberno de España.”

Aprobada pola unanimidade das 73 deputadas e deputados

(Resolución resultante da transacción entre o G.P. dos Socialistas de Galicia e o G.P. Popular de Galicia verbo da proposta de resolución núm. 26 do G.P. Popular de Galicia)

8.^a Resolución

“O Parlamento de Galicia insta a Xunta a seguir avanzando cara á neutralidade climática, tomando novas medidas orientadas a avanzar na loita contra cambio climático e a implantación da economía circular, poñendo o clima no centro das políticas. Nesa liña, entre

outras medidas, afondarase na promoción do transporte público, o cal debe tender a dar unha resposta adecuada ás necesidades de mobilidade da cidadanía galega, para consolidar un modelo de mobilidade máis accesible e máis respectuoso co medio, impulsando tamén no transporte colectivo de titularidade autonómica o uso dos combustibles renovables e promovendo a sustentabilidade nas estacións de autobuses co emprego de materiais reciclados ou coa instalación de elementos que contribúan á eficiencia enerxética; a incidir na aposta que está a realizar pola descarbonización da mobilidade coa execución de novos quilómetros de sendas peonís e ciclistas ao longo do territorio, especialmente na contorna das grandes áreas urbanas; e a contribuír á loita contra o cambio climático con iniciativas pioneiras e innovadoras como a revexetación da rede de estradas autonómicas con especies autóctonas nas súas marxes, que contribúan a eliminar pirófitas e invasoras e aumenten a eficacia das vías como cortallumes. ”

Aprobada por 55 votos a favor, 18 en contra e 0 abstencións.

(Resolución resultante da transacción entre o G.P. dos Socialistas de Galicia e o G.P. Popular de Galicia verbo da proposta de resolución núm. 13 do G.P. Popular de Galicia)

9.^a Resolución

“O Parlamento de Galicia adopta como resolución condenar a acción terrorista levada a cabo polo grupo Hamás contra o pobo de Israel, así como insta o Goberno da Xunta de Galicia a dirixirse ao Goberno de España para que defenda que a Unión Europea manteña as axudas de carácter humanitario dirixidas ao pobo palestino, garantindo, de acordo coas resolucións da Comisión Europea, que ningún financiamento da Unión Europea remate, directa ou indirectamente, proporcionando soporte a ningunha organización ou acción terrorista contra o Estado de Israel. ”

Aprobada por 55 votos a favor.

(Resolución resultante da transacción entre o G.P. dos Socialistas de Galicia e o G.P. Popular de Galicia verbo da proposta de resolución núm. 2 do G.P. dos Socialistas de Galicia)

10.^a Resolución

“O Parlamento de Galicia acorda como resolución a condena do terrorismo e de calquera discurso que xustifique ou minimize ou non condene as súas graves consecuencias, pois provoca unha dor incalculable na poboación civil e a perda de vidas humanas e nunca pode ser o medio para lograr obxectivos políticos, sexan os que sexan.”

Aprobada pola unanimidade das 73 deputadas e deputados.

(Proposta de resolución núm. 40 do G.P. Popular de Galicia).

11.^a Resolución

“O Parlamento de Galicia insta a Xunta de Galicia a demandar do Goberno de España que deseñe conxuntamente co sector un cambio do modelo de xestión dos programas do Imsero, así como o incremento do prezo que se aboa ao sector turístico polas prazas dos programas.”

Aprobada por 42 votos a favor, 0 en contra e 31 abstencións.

(Proposta de resolución núm. 9 do G.P. Popular de Galicia).

12.^a Resolución

“O Parlamento de Galicia insta a Xunta de Galicia a fortalecer os cadros de persoal da Administración autonómica, aprobando a oferta pública de emprego do ano 2023 no prazo dun mes para continuar na senda da redución da temporalidade e seguir cunha eficaz prestación dos servizos públicos; esta oferta convocará, como desde o ano 2009, o máximo de prazas que permite a taxa de reposición aprobada polo Ministerio de Facenda e Función Pública. E a reclamar ao Goberno central a eliminación das taxas de reposición nas convocatorias de ofertas de emprego público para favorecer a redución da temporalidade.”

Aprobada por 42 votos a favor, 0 en contra e 31 abstencións.

(Proposta de resolución núm. 23 do G.P. Popular de Galicia).

13.^a Resolución

“O Parlamento de Galicia insta a Xunta de Galicia a exixir ao Goberno central que recoñeza as lexítimas competencias de Galicia na xestión do dominio público marítimo-terrestre atribuídas no seu Estatuto de autonomía e desenvolvidas na Lei do litoral de Galicia, recentemente aprobada, e a que realice o traspaso efectivo dos medios persoais e materiais necesarios para poder exercelas, para garantir unha efectiva protección do medio natural e a promoción económica das zonas costeiras.”

Aprobada por 60 votos a favor, 13 en contra e 0 abstencións.

(Proposta de resolución núm. 12 do G.P. Popular de Galicia).

14.^a Resolución

“O Parlamento de Galicia insta a Xunta de Galicia a prestar servizos de apoio, acompañamento, asistencia e asesoramento ás mulleres e menores que viron como os seus agresores se beneficiaban das excarceracións e reducións de penas, en aplicación da Lei

orgánica 10/2022, do 6 de setembro, de garantía integral de liberdade sexual (coñecida como “Lei do só si é si”), e evitar, deste xeito, situacións de desprotección, revitimización e perda de confianza nas institucións e na Xustiza.”

Aprobada por 60 votos a favor, 0 en contra e 13 abstencións.

(Proposta de resolución núm. 29 do G.P. Popular de Galicia).

15.^a Resolución

“O Parlamento de Galicia insta a Xunta de Galicia a continuar desenvolvendo a Estratexia Retorna 2023-2026, especialmente aquelas medidas recollidas no obxectivo 20º, relativo á promoción da captación e retorno de persoal investigador, fomentando a súa incorporación aos distintos centros de coñecemento, empresas e institucións que traballan no ámbito da I+D+i, co fin de seguir a promover a retención e captación de talento na nosa comunidade. Igualmente, insta o Goberno de España a que tome as medidas necesarias para favorecer a integración das familias retornadas, dotando de financiamento axeitado as comunidades autónomas, mellorando os niveis de atención nos servizos consulares do Estado para axilizar os trámites ordinarios, introducindo plans estatais específicos de acceso á vivenda para familias retornadas, axilizando o procedemento de homologación de títulos universitarios obtidos no exterior, reducindo os trámites e axilizando as concesións de permisos de residencia e traballo dos cónxuxes e descendentes sen nacionalidade e eliminando as desigualdades coas que a lexislación fiscal estatal grava os emigrantes e os retornados, así como mellorando a información e os criterios de aplicación da AEAT.”

Aprobada por 42 votos a favor, 13 en contra e 18 abstencións.

(Proposta de resolución núm. 20 do G.P. Popular de Galicia).

16.^a Resolución

“O Parlamento de Galicia insta a Xunta de Galicia a seguir impulsando medidas de conciliación e apoio ás familias, no marco da Lei de impulso demográfico, e a reclamar do Goberno de España que contribúa no financiamento da gratuidade total da educación infantil de 0 a 3 anos en Galicia.”

Aprobada por 42 votos a favor, 13 en contra e 18 abstencións.

(Proposta de resolución núm. 25 do G.P. Popular de Galicia).

17.^a Resolución

“O Parlamento de Galicia insta a Xunta de Galicia a deseñar e articular unha proposta detallada das cualificacións profesionais que serán necesarias para facer fronte aos empregos do futuro, xunto coa elaboración dos módulos formativos necesarios, co obxectivo de mellorar a capacitación dos traballadores ocupados e a empregabilidade das persoas desempregadas, ofrecendo así mesmo modalidades formativas accesibles e flexibles para toda a poboación.”

Aprobada por 42 votos a favor, 18 en contra e 13 abstencións.

(Proposta de resolución núm. 30, do G.P. Popular de Galicia).

18.^a Resolución

“O Parlamento de Galicia insta a Xunta de Galicia a impulsar a igualdade no mundo laboral a través dun programa de apoio á formación e contratación de mulleres en ocupacións laborais masculinizadas e a seguir traballando na rotura da fenda salarial a través do desenvolvemento da nova Lei de igualdade.”

Aprobada por 42 votos a favor, 18 en contra e 13 abstencións.

(Proposta de resolución núm. 31, do G.P. Popular de Galicia).

19.^a Resolución

“O Parlamento de Galicia insta a Xunta de Galicia a rebaixar un punto o tipo xeral do imposto de transmisións patrimoniais, do 9 por cento ao 8 por cento, para contribuír a dinamizar o mercado inmobiliario de segunda man e facilitar o acceso á vivenda.”

Aprobada por 55 votos a favor, 18 en contra e 0 abstencións.

(Proposta de resolución núm. 3, do G.P. Popular de Galicia).

20.^a Resolución

“O Parlamento de Galicia insta a Xunta de Galicia a continuar coa simplificación e axilización dos procedementos administrativos co fin de facilitar os trámites á cidadanía (Tarxeta Benvida, expedición e renovación da condición de familia numerosa...).”

Aprobada por 55 votos a favor, 18 en contra e 0 abstencións.

(Proposta de resolución núm. 5, do G.P. Popular de Galicia).

21.^a Resolución

“O Parlamento de Galicia insta a Xunta de Galicia a continuar apostando firme e decididamente polo aproveitamento das oportunidades que supoñen as enerxías renovables, ata o punto de permitir á nosa comunidade seguir sendo unha potencia (un actor de primeira orde) neste ámbito e un referente no proceso de transición enerxética equilibrada e responsable, tamén desde o punto de vista da súa sustentabilidade, integración paisaxística e retorno social.

Nese senso, apoiaranse as iniciativas dirixidas a que os beneficios do aproveitamento dos recursos naturais se reinvestan en Galicia, poñendo esta inmensa riqueza ao servizo da cidadanía, e rexeitarase toda pretensión de criminalizar sectores —como o eólico— que na nosa comunidade contan cunha rigorosa tramitación ambiental, son fundamentais na loita contra o cambio climático e teñen un gran potencial de xerar riqueza e impulsar o progreso de toda Galicia.”

Aprobada por 55 votos a favor, 18 en contra e ningunha abstención.

(Proposta de resolución núm. 16 do G.P. Popular de Galicia).

22.^a Resolución

“O Parlamento de Galicia insta a Xunta de Galicia a adoptar as medidas necesarias para que a Comunidade Autónoma se converta nun referente dentro da península ibérica en canto á atracción de empresas, mediante o acompañamento ás persoas promotoras das iniciativas, a simplificación e axilización das tramitacións administrativas, a mellora da dispoñibilidade e condicións de acceso ao solo empresarial e o apoio económico mediante axudas a fondo perdido e financiamento do investimento inicial.”

Aprobada por 55 votos a favor, 18 en contra e ningunha abstención.

(Proposta de resolución núm. 17 do G.P. Popular de Galicia).

23.^a Resolución

“O Parlamento de Galicia insta a Xunta de Galicia a desenvolver unha ampla oferta formativa en FP, que se reforzará a través da formulación dun novo plan de orientación integral en itinerarios profesionais que permita detectar o risco de abandono dos estudos antes de que se produza e conseguir derivar ese alumnado a ciclos de formación básica.”

Aprobada por 55 votos a favor, 18 en contra e ningunha abstención.

(Proposta de resolución núm. 22 do G.P. Popular de Galicia).

24.^a Resolución

“O Parlamento de Galicia insta a Xunta de Galicia a afondar na liña de traballo que vén desenvolvendo nos últimos anos de descontos e conxelación das tarifas nas autoestradas autonómicas, A Coruña-Carballo e Vigo-Baiona, para facilitar a competitividade económica e contribuír á seguridade viaria, así como a seguir reclamando e defendendo ante o Goberno de España a transferencia da xestión completa da AP-9, cos recursos suficientes para manter as bonificacións e completar as obras pendentes, e reivindicar para a AP-53, unha das autoestradas máis caras de España e única sen ningún tipo de bonificacións, o mesmo réxime de descontos da AP-9.”

Aprobada por 55 votos a favor, ningún en contra e 18 abstencións.

(Proposta de resolución núm. 7 do G.P. Popular de Galicia).

25.^a Resolución

“O Parlamento de Galicia insta a Xunta de Galicia a fomentar hábitos de vida saudable e promover o deporte de base, axudando as familias a través dun bono deporte.”

Aprobada por 55 votos a favor, ningún en contra e 18 abstencións.

(Proposta de resolución núm. 11 do G.P. Popular de Galicia).

26.^a Resolución

“O Parlamento de Galicia insta a Xunta de Galicia a demandar ao Goberno de España que autorice canto antes aqueles proxectos enerxéticos da súa competencia que se demostraron ambientalmente viables ao contaren con declaración de impacto ambiental favorable e que están vinculados a industrias galegas (Alcoa, Resonac e os proxectos industriais das Pontes de García Rodríguez), permitíndolles, así, contar con parte da súa enerxía a un prezo enerxético fixo, dando así seguridade e estabilidade.”

Aprobada por 55 votos a favor, ningún en contra e 18 abstencións.

(Proposta de resolución núm. 19 do G.P. Popular de Galicia).

27.^a Resolución

“O Parlamento de Galicia insta a Xunta de Galicia a fomentar a construción estrutural en madeira —nunha porcentaxe mínima— en edificacións impulsadas polo Goberno galego.”

Aprobada por 55 votos a favor, ningún en contra e 18 abstencións.

(Proposta de resolución núm. 33 do G.P. Popular de Galicia).

28.^a Resolución

“O Parlamento de Galicia insta a Xunta de Galicia a crear un carné+65 para ofrecer descontos e vantaxes ás persoas maiores da comunidade, de forma semellante ao que fai cos mozos no actual Carné Xove.”

Aprobada por 55 votos a favor, ningún en contra e 18 abstencións.

(Proposta de resolución núm. 38 do G.P. Popular de Galicia).

29.^a Resolución

“O Parlamento de Galicia insta a Xunta de Galicia a reclamar ao Goberno de España a inmediata convocatoria da Comisión Mixta de Transferencias para axilizar a transferencia das competencias prioritarias para Galicia, de conformidade coas previsións contidas na Constitución e no Estatuto de autonomía, en particular a transferencia da titularidade da AP-9 e da xestión do ingreso mínimo vital.”

Aprobada pola unanimidade das 73 deputadas e deputados

(Proposta de resolución núm. 10 do G.P. Popular de Galicia).

30.^a Resolución

“O Parlamento de Galicia insta a Xunta de Galicia a traballar no impulso de Galicia como nodo loxístico estratéxico do sur de Europa, aproveitando as fortalezas xeográficas e as alianzas estratéxicas con outros territorios, promovendo as infraestruturas e os servizos que faciliten o movemento de mercancías no noso territorio e reclamando do Goberno de España o cumprimento dos seus compromisos de elaboración e presentación dun plan director do corredor atlántico de mercadorías que recolla as actuacións e os investimentos necesarios para a modernización da liña ferroviaria que garanta que o Noroeste peninsular se erixa nun polo loxístico de referencia, con axuda do financiamento europeo e en igualdade de condicións que o corredor mediterráneo.”

Aprobada pola unanimidade das 73 deputadas e deputados

(Proposta de resolución núm. 14 do G.P. Popular de Galicia).

31.^a Resolución

“O Parlamento de Galicia insta a Xunta de Galicia a habilitar axudas por importe de 12 millóns de euros destinadas á produción de carne de calidade en extensivo; igualmente, a lanzar un programa de protección das aldeas e dos montes baseado no fomento do pastoreo nas zonas con maior risco de incendios.”

Aprobada pola unanimidade das 73 deputadas e deputados

(Proposta de resolución núm. 32 do G.P. Popular de Galicia).

32.^a Resolución

“O Parlamento de Galicia insta a Xunta de Galicia a impulsar un bono universal de coidados, cun importe de 5.000 euros ao ano, para os galegos con dependencia recoñecida que están a ser atendidos no seu fogar.”

Aprobada pola unanimidade das 73 deputadas e deputados

(Proposta de resolución núm. 36 do G.P. Popular de Galicia).

33.^a Resolución

“O Parlamento de Galicia insta a Xunta de Galicia a poñer en marcha un complemento de 1.200 euros ao ano para todas as persoas con dependencia que teñen unha axuda para o pagamento dunha residencia da súa elección.”

Aprobada pola unanimidade das 73 deputadas e deputados

(Proposta de resolución núm. 37 do G.P. Popular de Galicia).

34.^a Resolución

O Parlamento de Galicia insta a Xunta de Galicia a dirixirse ao Goberno central para reclamar a creación de cinco novos xulgados exclusivos contra a violencia de xénero en Ourense, Santiago de Compostela, Lugo, Pontevedra e Ferrol.”

Aprobada pola unanimidade das 73 deputadas e deputados

(Proposta de resolución núm. 39 do G.P. Popular de Galicia).

35.^a Resolución

“O Parlamento de Galicia acorda como resolución rexeitar calquera proxecto que trate de romper a convivencia e de destruír o valioso patrimonio que representa a condición de cidadáns libres e iguais en dereitos e obrigacións, disposto na Constitución española e no Estatuto de autonomía de Galicia, e, nesa mesma liña, rexeitar calquera negociación que, co pretexto de evitar conflitos territoriais, limite a soberanía do conxunto dos cidadáns e o exercicio dos seus dereitos, así como calquera pretensión de recoñecer privilexios a determinados territorios ou cidadáns.”

Aprobada por 42 votos a favor, 31 en contra e ningunha abstención.

(Proposta de resolución núm. 1 do G.P. Popular de Galicia).

36.^a Resolución

“O Parlamento de Galicia insta a Xunta de Galicia a rebaixar o tipo xeral na transmisión de vehículos, do 8 por cento ao 3 por cento, para situar Galicia como a comunidade autónoma con menor fiscalidade nestas operacións, e a eliminalo no caso dos vehículos e embarcacións de cero emisións e as bicicletas e patinetes de mobilidade persoal.”

Aprobada por 42 votos a favor, 31 en contra e ningunha abstención.

(Proposta de resolución núm. 4 do G.P. Popular de Galicia).

37.^a Resolución

“O Parlamento de Galicia insta a Xunta de Galicia a promover a constitución dunha sociedade público-privada que impulse e participe no desenvolvemento de proxectos de aproveitamento dos recursos naturais de Galicia que xeren beneficios económicos e sociais na Comunidade Autónoma e, entre eles, o acceso á enerxía a prezos competitivos por parte das persoas e industrias consumidoras galegas.”

Aprobada por 42 votos a favor, 31 en contra e ningunha abstención.

(Proposta de resolución núm. 18 do G.P. Popular de Galicia).

38.^a Resolución

“O Parlamento de Galicia insta a Xunta de Galicia a activar iniciativas e mecanismos que favorezan unha cultura accesible e inclusiva, especialmente daqueles colectivos máis desfavorecidos, ao tempo que se seguen a desenvolver políticas de impulso e acompañamento do sector cultural galego para que manteña altos estándares de dixitalización e innovación, industrialización e xeración de emprego, así como unha elevada implantación no conxunto do

territorio da nosa comunidade. E, en particular a demandar do Goberno de España a que impulse un PERTE dirixido ao sector cultural, capaz de impulsar o benestar social e económico da nosa comunidade e de favorecer aos máis de 35.000 profesionais que traballan neste eido, tendo en conta ademais o rico bagaxe cultural de Galicia e as oportunidades e potencial que representa este sector de actividade. De xeito paralelo, impulsárase a modernización das infraestruturas que apoian os arquivos do Estado en Galicia, en particular a reforma do edificio da praza da Ferraría, en Pontevedra, hoxe en desuso, co obxecto de que albergue o Arquivo Histórico Provincial.”

Aprobada por 42 votos a favor, 31 en contra e ningunha abstención.

(Proposta de resolución núm. 21 do G.P. Popular de Galicia).

39.^a Resolución

“O Parlamento de Galicia insta a Xunta de Galicia a renovar a súa defensa da lingua galega baixo o respecto á Constitución, ao Estatuto de autonomía e ao marco legal específico, a prol da mellor convivencia lingüística entre linguas cooficiais en España e do aproveitamento dos vínculos coa lusofonía. Co desenvolvemento do Proxecto Nós e co deseño de novas medidas, traballarase por acadar máis usos do galego en diferentes ámbitos, como nas contornas urbanas, no sector audiovisual, nos espazos dixitais e na internet, ao tempo que se intensificarán os esforzos para a recollida e fixación da nosa toponimia como patrimonio inmaterial, co obxectivo de que milleiros de topónimos poidan enriquecer a nosa bagaxe cultural e científica.”

Aprobada por 42 votos a favor, 31 en contra e ningunha abstención.

(Proposta de resolución núm. 24 do G.P. Popular de Galicia).

40.^a Resolución

“O Parlamento de Galicia insta a Xunta de Galicia a, nun contexto de déficit de profesionais sanitarios, continuar realizando as accións necesarias, tanto lexislativas como organizativas, para garantir a ocupación das prazas consideradas como de difícil cobertura no Servizo Galego de Saúde e para consolidar a calidade do sistema de formación sanitaria especializada e incrementar a súa capacidade naquelas especialidades deficitarias, para o que debe seguir reclamando o cumprimento por parte do Goberno de España dos acordos pendentes ao respecto da reforma deste sistema.”

Aprobada por 42 votos a favor, 31 en contra e ningunha abstención.

(Proposta de resolución núm. 27 do G.P. Popular de Galicia).

41.^a Resolución

“O Parlamento de Galicia insta a Xunta de Galicia a manter o seu compromiso coa atención aos problemas de saúde mental, procedendo a completar a implantación o Plan de saúde mental 2020-2024, e a realizar unha avaliación do seu cumprimento para, unha vez acadadas as conclusións, comezar a redactar un novo Plan de saúde mental 2025-2029 que avance dun xeito decidido na prestación de atención psicolóxica en atención primaria.”

Aprobada por 42 votos a favor, 31 en contra e ningunha abstención.

(Proposta de resolución núm. 28 do G.P. Popular de Galicia).

Santiago de Compostela, 11 de outubro de 2023

Miguel Ángel Santalices Vieira
Presidente